

Храм свт. Луки Крымского, Киев



# Служба с акафистом святителю Луке Крымскому

## На велицей вечерни

### На " Господи возвах": стихиры на 8, глас 4.

Святителю Луко, Крымстей земли похвало, Церкви Православныя удобрение, веры жертва священная, исповедников честное и светоносное украшение, врачу благий и милостивый: моли от болезней и бед избавиться верою творящим всечестную память твою.

Исповедник священный, и святитель благоприятен, и архипастырь истинен Крымстей пастве, благочестия степень, столпе и утверждение Церкви, святителей доброта, источник исцелений, Луко, был еси. Темже ты ублажаем песнями духовными и Божественное твое днесь совершаем торжество.

Божественный глас егда услышал еси, блаженне Луко, тогда, крест твой взем, последовал еси Христу и, любовь к Нему распалаемь, исповедник мужествен и святитель Богомудрый был еси. Темже и райския селения наследовал еси Христу, Емуже трудился еси, Тому молися спасти и просветити души наша.

### Ины стихиры. Глас 8.

С похвалами память твоя сотворяется светло, Святителю Луко, и радости наполняет православная чада земли наша, яко правду возлюбльшаго, и многия подвиги твоего исповедничества архипастырь богомудрый явился еси и ныне Благолепия красоту Небесного Царствия лицом к лицу зриши, пребогате.

Богомудре святителю отче Луко, имея душу милостивну, православною мудростию сияющую, любовь нелицемерную и сердце мужественно, апостолу Луке уподобился еси, во изгнаниях терпеливо пребывая, в нуждах и скорбех неоскудно утешаемь и прехождения присно творя, ныне же безпечальное и неизменное от Бога обрел еси селение и наслаждение.

Святителю Христов Луко, многи беды подъял еси в юзилицах заключаем, приобщающесе болезнем и напастем: прелести зиму теплотою Божественныя благодати разорил и ныне ко Христу незаходимому сиянию вселился еси, молися даровати душам нашим мир и велию милость.

### Слава, глас 8:

Святителю отче Луко пречудне, служителю Таин Божественных, делателю винограда Христова, веры утверждение, Церкви Православныя столпе непоколебимый, источнике исцелений обильный, крымстей пастве теплый предстателю, моли спастися душам нашим.

### И ныне, Богородичен, глас тойже:

Царь Небесный за человеколюбие на земли явися и с человеки поживе, от Девы бо Чистыя плоть приемый и из Нея прошедый с восприятием, един есть Сын, сугуб естеством, но не Ипостасию. Темже, совершенна Того Бога и совершенна Человека воистинну проповедающе, исповедуем Христа Бога нашего: Егоже моли Мати Безневестная помилватися душам нашим.

## **Вход. Прокімен дне. И чтёния.**

1. Притчей чтёние: "Па́мять пра́веднаго с похва́лами, и Благосло́вѣніе Господне на гла́вѣ его́..." (1-я святителю еди́ному).
2. Премудрости Соломо́новы чтёние: "Пра́ведницы во ве́ки живу́т, и в Го́споде мзда их ..." (2-я исповедникам).
3. Премудрости Соломо́новы чтёние: "Пра́ведных ду́ши в руце́ Бо́жией..." (1-я исповедникам).

## **На литіи стихи́ры, глас 6:**

И́же благода́тию Боже́ственнаго Ду́ха собра́ннии днесь христолю́бцы, ликъ со́ставльше, поёмъ песнь но́ву, па́мять сотворя́ще святителя и исповедника Лу́ки, и вси соше́дшеся Спа́са велича́ем и торжества́ ви́новнику моле́бне рцемъ: я́ко имы́й дерзнове́ние у Царя́ Сла́вы, моли́ изба́виться вреда́ всякаго́ от ду́ши славящихъ тя.

Просвети́ся житіе́ твоё добродѣ́тельными свѣ́тлостыи ве́рныя просвети́л еси́ и тьму́ нечестія́ разгна́в, и́стинное я́вился еси́ свѣтоза́рное со́лнце, святителю́ преблагенне́ Луко́, и ны́не вселился еси́, иде́же сияетъ Свѣт Невече́рний, и сынъ дне благода́тию Ду́ха Свята́го бывъ, Те́мже свѣтоно́сное твоё просла́вѣніе усердне́ соверша́юще, исповедниче́, лю́бовію почи́таемъ.

## **Сла́ва, глас 8:**

Укращена́ добродѣ́тельми духо́вными, святителю́ исповедниче́ Луко́, просла́ви тя Господь Бог житіемъ и даромъ целѣ́нія неду́гов. Днесь, блаженне́, и нас моли́твами твоими́ соблюди́ от всякихъ грехопаде́ній, праждну́ющихъ святу́ю па́мять твою́, и со стра́хом и лю́бовію припада́ющихъ к твоёму́ гробу́, и образъ подо́бия твоего́ лю́безно́ целу́ющихъ, не преста́й моля́ся за правосла́вныя лю́ди, я́ко да Милостивы́й Господь спасѣ́тъ ду́ши наша́.

## **И ны́не, Богородичен, глас тойже:**

Безневѣ́стная Де́во, я́же Бо́га неизрече́нно заче́нши плото́ю, Ма́ти Бо́га Вы́шняго, Твои́хъ рабо́в мо́льбы приими́, Всенепоро́чная, всемъ пода́ющи очи́щеніе прегреше́ній, ны́не на́ша моле́нія прие́млющи, моли́ спастися́ всемъ намъ.

## **На стихо́вне стихи́ры, глас 1:**

Похвала́ еси́ земли́ Кры́мстей и гра́ду Симфе́рополю́ утвержде́ние, щитъ и побе́да на сопро́тивныя, и всемъ намъ помо́щникъ и заступникъ, и моли́твенникъ о ду́шахъ на́шихъ.

**Стихъ:** Уста́ моя́ возглаго́лютъ премудро́сть и поуче́ніе се́рдца моего́ разу́мъ.

Небе́сный кругъ звезда́ми украша́ется, твой же умъ, святителю́ Луко́, Боже́ственными просвеще́ньми облиста́емъ, множества́ добродѣ́телей собра́ тебе́. Те́мже богоглаго́ливый язы́комъ своимъ, я́ко водо́ю живото́рною Ду́ха, напая́ешн се́рдца, истая́вша грехми́, от глубины́ отчая́нія возведи́, премудре́, Бо́жие милосе́рдие симъ возвеща́я.

**Стих:** Услышите сия вси языцы, внушите вси живущии по вселенней.

Приидите вси людие, возрадуемся и возвеселимся днесь, в честный сей день прославления великаго угодника святителя Луки, славу и хвалу Богу воздадим, давшему нам такового к Нему предстателя и молитвенника.

**Слава, глас 6:**

Днесь воистину подобает совершатися духовному торжеству, и славе, и хвале к Богу приноситься во святем храме сем, всем же радоватися духовне и веселитися, зря сего своего святителя Луки, в толицей славе у Бога пребывающа, и мощми своими верныя люди просвещающа. Сего ради ликуй и все православное множество, яко дарова нам Господь такового к нему предстателя и молитвенника.

**И ныне, глас тойже, Богородичен:**

Богородице, Ты еси лоза истинная, возрастившая нам плод живота, Тебе молимся: молись, Владычице, со святителем Лукою помилovati души наша.

**На благословении хлебов тропарь святителя дважды и Богородице Дево единожды.**

**Тропарь, глас 1:**

Возвестителю пути спасительнаго, / исповедниче и архипастырю Крымския земли, / истинный хранителю отеческих преданий, / столпе непоколебимый, православия наставниче, / врачу богомудрый святителю Луко, / Христа Спаса непрестанно моли, / веру непоколебиму православным даровати / и спасение, и велию милость.

## На утрени

**На “Бог Господь” тропарь святителя дважды.**

**Слава и ныне, Богородичен, глас 1:**

Гавриилу вещавшу Тебе, Дево, радуйся, со гласом воплощашеся всех Владыка в Тебе, Святем Кивоте, якоже рече праведный Давид, явилася еси ширшая Небес, поносивши Зиждителя Твоего: слава Всельшемуся в Тя: слава Прошедшему из Тебе: слава Свободившему нас Рождеством Твоим.

**По стихословии, седален, глас 3:**

Новый светильник Церкви Христовой явился еси, Святителю Луко, и молитвенник теплый, яко и по смерти неотступно нас посещаеши. Темже и припадаем к тебе, святой угодниче Божий, моли о нас, любовьию память твою почитающих, да избавимся от всех бед и напастей, и спасение улучим молитвами твоими.

### **Сла́ва и ны́не, Богоро́дичен:**

Богора́дованная Влады́чице, святи́телем удо́брение, пра́ведным утвержде́ние и ве́рным все́м похва́ло, спаси́ ны от бед, и скорбе́й, и лю́тых прегреше́ний предста́тельством и мо́литвами Твоими.

### **Седа́лен 2-й из о́бщей Мине́и.**

## **Полиеле́й**

**Велича́ние:** Велича́ем тя, испове́днице Христо́в святи́телю о́тче наш Луко́, и чтим свя́тую па́мять твою́, ты бо мо́лиши о нас Христа́ Бо́га нашего.

**Псалом избра́нный:** Услы́шите сия́ вси язы́цы...

### **По полиеле́и седа́лен, глас 4:**

Всечестна́я и светно́сная твоя́ па́мять, святи́телю Луко́, ра́дости всех испо́лни и весе́лия духо́вного, те́мже соше́дшеся христоимени́тии лю́дие, любо́вию восхваля́юще труды́ твоя́ во святи́тельстве и терпе́ние в испове́дничестве, милосе́рдие к стра́ждущим и исцеление от боле́зней, сла́вим просла́вльшаго тя Господа. Его́же моли́ спасти́ всех любо́вию тя почи́тающих.

### **Сла́ва и ны́не, Богоро́дичен:**

Под кров Твой прибега́ем, Пречистая Де́во: мо́льбу́ убо принеси́ о нас к Человеколю́бцу Бо́гу, спаси́ся рабо́м Твоим.

### **Степе́нна, 1 антифо́н 4-го гласа.**

**Прокі́мен, глас 1:** Уста́ моя́ возглаго́лют прему́дрость, и поуче́ние се́рдца моего́ разу́м.

**Стих:** Услы́шите сия́ вси язы́цы, внуши́те вси живу́щии по вселе́нней.

### **Ева́нгелие от Иоа́нна, зач. 35, от полу́.**

### **По 50-м псалме́ стихи́ра, глас 6:**

Тя ходата́я и моли́твенника́ благоприя́тна има́мы, святи́телю о́тче наш Луко́, ты бо мо́лиши за вся правосла́вныя лю́ди, я́ко да изба́вимся от неду́гов душе́вных и теле́сных, от бед и скорбе́й, и от всяка́го наве́та вра́жия. Тем просла́вляем твою́ свя́тую и честну́ю па́мять, зову́ще: не преста́й моли́тися о душа́х наших.

## Каноны

**Канон Пресвятей Богородице со ирмосом на 6.  
Канон святителю на 8, егже краегранесие:**

**СВЯТИТЕЛЮ ЛУКЕ УСЕРДНОЕ ПРИНОШЕНИЕ.**

**Глас 8.**

**Песнь 1.**

**Ирмос:** Дивному Богу величия принесем, и великолѣпно с нами да воспоеет земля и небо ясно славу Его.

Святительский престол во граде Симферополе украсил светло, в немже пожив, яко Ангел, святым житием и учением Божественным освятил еси люди, да вси приносят величия Божия и поют славу Его.

Вседержителя и Господа о нас моли, святителю Луко, даровати нам оставление прегрешений, да с тобою дивному Богу величия принесем, и воспоем славу Его.

Явился еси ныне в памяти твоей Крымстей пастве, исповедниче Христов, столп непоколебимый и стена нерушимая, болящим утешение, грешников споручниче, Богу величия принося и воспевая славу Его.

**Богородичен:** Тя призывающим спасительное еси пристанище и покров, Богородительнице Пречистая, темже от души призываем Тя тепле: Владычице, спаси ны и научи нас дивному Богу величия приносить и воспевати славу Его.

**Песнь 3.**

**Ирмос:** Уподобил мя, Христе, умно горе Сионстей, возвысивый и утвердивый в надежди о Тебе и искапавый росу благодати, Человеколюбец.

Источил еси, святителю, учения реки благодатныя и всяку душу благочестивых напоил еси, многия исцелил еси и о всех усердне молился, да искапает росу благодати Своея Человеколюбец.

Труды твоими, яко добрый пастырь, святителю Луко, указал еси людем путь в Царство Небесное и за подвиги твоя от Бога венчан славою на небеси, Егже моли, да ниспослет и нам росу благодати Своея, Человеколюбец.

Егда волею Божию изгнание в Сибирь и темницы, и многия скорби найдоша на тя, тогда терпением мужемудренно вся победил еси, исповедав Христа, и моля Его, да источит на всех росу благодати Своея, яко Человеколюбец.

**Богородичен:** Любити убо Тя, Пречистая Богомати, и песнию прославляти Тебе научает нас великий Архангел и звати, Богоневесто, еже радуйся, яко Господь с Тобою: радуйся, Радосте Ангелов и всех человеков.

## Седáлен, глас 8:

Ко Гóсподу имéя óчи сердéчныя, святителъ явилъ еси́ Богоподобен и Крымскую па́ству преславно упасл еси́, отгоняя полки́ безбо́жных па́лицею словéс Божéственных, тёмже по кончине благодать достойно наследовал еси́, святителю блаженне. Сего́ ради вопиём ти: моли́ Христа́ Бóга грехов оставлénие даровати́ чтущим всечестную пáмять Твою́.

## Слáва и ны́не, Богорóдичен:

Тя пристáнище, и стéну, и прибе́жище, и наде́жду, и покрóв, и заступлénие тёплое обрётше вернии, к Тебé притекаем и вопиём приле́жно, и зовём верно: помилуй, Богорóдице, упова́ющих на Тя и от прегрешéний изба́ви.

## Песнь 4.

**Ирмо́с:** Всел еси́ на ко́ни, апóстоли Твоя́, Гóсподи, и прия́л еси́ рука́ма Твоима́ у́зды их, и спасéние бысть еждéние Твоё́ верно́ поющим: сла́ва си́ле Твоей, Гóсподи.

Ю́же стяжа́л еси́ честно́ю Твое́ю Кро́вию, Цёркве Твоея́, Христé, ча́да утверди́ и на́прави на путь ми́ра, та́ко воздыха́л еси́ к Сы́ну Бóжию, святителю́ óтче наш Луко́, преподо́бныя своя́ руце о па́стве возде́юща.

Любы́ николи́же отпа́дает, глаго́лет Божéственный Ду́х уста́ми апóстола Па́вла. В твои́х денно́щных труда́х исцелéний недужных, любóвь твоя́ известя́ся, уго́днице Христóв, и си́ю проявил еси́ в милосердии, непрестанно́ вдов пита́я и сирых, и нéмошных.

Учéньми, му́дре святителю́, ста́до твоё́ утверди́л еси́ в вéре и добродéланием твоим Цёркви́ был исповéдник и учите́ль Луко́.

**Богорóдичен:** Кре́пость на́ша Ты еси́, Пречы́стая Богома́ти, Твоими́ бо мольба́ми и святителю́ Луки́, изба́вихомся вси́ от страсте́й, и бед, и обстоя́ний, и неду́гов многообразных, Спа́су Христу́ зовуще: сла́ва си́ле Твоей, Гóсподи.

## Песнь 5.

**Ирмо́с:** Повелéния Твоя́ просвещéнием, Христé́ Бóже, я́ко Благ, показа́л еси́, занé, Светода́вче, от но́щи у́треннююще, сла́ву возсыла́ем.

Еди́ницу несозда́нную богосло́вил еси́ Трои́цу Святу́ю Бóга на́шего и челове́ческаго естества́ состав в ду́хе, ду́ше и теле́ священными богосло́вии твоими́ научи́л еси́.

Умо́м чы́стым и писáнии духо́вными назидáл еси́, Богоглаго́ливе Луко́, о́браз был еси́ всей́ богода́нной па́стве твоей, словом и жити́ем, любóвию, вéрою и чистото́ю.

Смотрéнием Бóжиим и святителским́ благословéнием руко́ю моё́ю приносимое тебе́ и твоим́ трудóм похвалéние, святителю́ Луко́, не отрини́, но приими́ и моли́ Христа́ Бóга, да изба́вит мя шу́яго стоя́ния и сподобит Небеснаго́ Царствя́ Своего́.

**Богородичен:** Еди́на Чи́стая, Богороди́тельница, не прѣзри моле́ний раб Твои́х, приими́ сия моли́твы ра́ди уго́дника Твоего́ свя́тителя Луки́, и принеси́ ко престо́лу Сы́на Твоего́, да спасе́т души́ наша.

## Песнь 6.

**Ирмос:** Отве́ргл мя еси́ во глуби́ны се́рдца морска́го, и ви́дех чуде́са Твоя́, Го́споди.

Ри́зную ху́дость имѣл еси́, пребога́те, вся бо своя́ неиму́щим раздава́л, си́роты и вдо́вья пита́я, рачи́тель же сый Милости́ваго Спаси́теля Христа́ быв.

Духо́вныя жи́зни всем лю́дем страны́ наше́я учи́тель был, благоче́стием украша́ясь, горды́ню посе́кл еси́, блаже́нне, духо́вным мечѣм, па́стыри назира́я и утвержда́я.

На па́жити Божѣ́ственней тружда́ясь, архиере́й сый, архипа́стырем на́шим в моли́твах спосо́бствуй, да пра́во пра́вят сло́во истины́, Це́рковь Правосла́вную огради́, страну́ нашу́ сохрани́, ве́ру в нас умно́жи, да сла́вим Христа́ во ве́ки.

**Богородичен:** Отрокови́це Богоизбра́нная, восхваля́ем Тя вси́ и ве́рно мо́лимся, Де́во Мари́е: моление́ наше́ приими́ и проше́ния исполни́.

## Конда́к, глас 1:

Яко́же звезда́ все́светлая, добродѣ́тельми сия́ющи, / был еси́ свя́тителю, / ду́шу же равноа́нгельну сотвори́л, / се́го ра́ди свя́тительства са́ном поче́тся, / во изгна́нии же от безбо́жных мно́го пострада́л / и непоколе́бим ве́рою пребы́в, / враче́бною му́дростию мно́гия исцели́л еси́. / Те́мже ны́не честное́ те́ло твоѣ́ от земле́нных недр обрете́нное дивно́ / Госпо́дь просла́ви, / да вси́ ве́рнии вопие́м ти: / раду́йся, о́тче свя́тителю Луко́, / земли́ Кры́мстей похва́ло и утвержде́ние.

## Икос:

Испове́дании свяще́нными подо́бствовав, се́ятель был еси́ духо́вных добродѣ́телей, нече́стия же яви́лся еси́ искорени́телю, свя́тителю Луко́ прехва́льне, яко́ архипа́стырь и учи́тель жи́знь соверши́в, к Небеси́ восте́кл еси́ и ве́нец неува́даемый от Го́спода прия́л. Се́го ра́ди вопие́м Ти: раду́йся о́тче свя́тителю Луко́, земли́ Кры́мстей похва́ло и утвержде́ние.

## Песнь 7.

**Ирмос:** В нача́ле зе́млю основа́вый и Небеса́ сло́вом утверди́вый, благослове́н еси́ во ве́ки, Го́споди, Бо́же о́тец на́ших.

Еле́ем любве́ твое́я пома́зал еси́ лю́ди, и́го Христо́во на ра́мо взем, послѣ́довал еси́ стопа́м Его́, свя́тительски потруди́лся, сло́во Бо́жие возвести́л да прославля́ют ве́рныя ча́да Со́творшаго вся́, по́я Го́сподеви: благослове́н еси́ во ве́ки Бо́же о́тец на́ших.

Па́стырь до́брый словѣ́сному ста́ду тво́ему, свя́тителю Луко́, был еси́, ду́шу твою́ за о́вцы положи́ти гото́вый: те́мже и яви́лся еси́ обидимым заступни́к непреобори́мый, пра́вды



же ревнитель неустрашимый, сильных мира сего с любовью обличая и пасомых своих отечески вразумляя и наставляя, да верно воспевают Господа, Бога отец наших.

Радовахуся людие града Симферополя, зряще тебе светлостию сана святительскаго облечена и престолу благодати Божией предстояща, усердно о пастве молящагося. И, по апостолу, вся всем быв, да всех ко Христу приведёши и купно со всеми вопиёши: благословен еси во веки, Господи, Боже отец наших.

**Богородичен:** Радости Подательнице, Богородительнице Пречистая, верою славящая от души поющая Тя, радости неизреченныя исполни и Света Невечерняго сподоби, Дево Богоблагодатная, Владычице.

## Песнь 8.

**Ирмос:** Покрываая водами превыспренняя Своя, полагаая морю предел песок и содержи вся, Тя поет солнце, Тя хвалит луна, Тебе приносит песнь вся тварь, яко Содетелю всех во веки.

Имя твоё, святителю Луко, якоже благоухание рая Божия по лицу всея земли наша обносится, услаждая сердца верующих и призывая в радости духовней воспевати Содетеля всех во веки.

Ныне ни в зеркалах, ни в гаданиях добрых, лицом же к лицу Христа Господа зриши, вопия радостно ты Прославльшему Содетелю всех во веки.

О, иерарше Богомудре, священное скончал еси течение, священнейшую жизнь твою священнейшее совершив, радуясь и воспевая освящающагося Содетеля всех Бога во веки.

**Богородичен:** Шедше путем Божественных заповедей Сына Твоего, Богомати, и Тя Заступницу и Предстательницу имея, весь род человеческий Твоим Рождеством от праотча падения восстает и от клятвы праматерния избавляется.

## Песнь 9.

**Ирмос:** Благословен Господь, Бог Израилев, воздвигнувший рог спасения нам в дому Давидове, отрока Своего, в них же посети нас Восток с высоты и направил ны есть на путь мира.

Евангелие Христово проповедав, мудре святителю, дело Божие на земли совершив и сподобившись приятия Святых Таин Христовых, о Боже почил еси.

Ныне с Вышними Воинствами моли, угодниче Христов, Человеколюбца даровати притекающим к предстательству твоему оставление грехов и жития исправление.

И по смерти, яко жив сый, благодатию Божиею с нами пребываеши, святителю Луко, пастирь добрый нам являеши, твердо стояти в православней вере укрепляя и в добродетельней жизни наставляя.

**Богородичен:** Еже радуясь, со Архангелом зовём Ти, Чистая, яко Царя Небеснаго родил еси, Дево Богородице, и молим Тя: избави ны, рабы Твоя вечныя смерти.

## Светілен:

Святитель и исповѣдник явилъ еси, Луко преславне, страстей Христовых раны нося. Плотию, аще и почил еси, но духом жив сый, в Царствии невечернем со Христом царствуеши и присно молишися Ему о верою и любовию тя величающих.

### Слава и ныне, Богородичен:

Вышних чиноначалий Превысшая сущи, нас нижних, не отступай, но присно с нами буди, свободяющи от всяких наветов, Твою бо, Владычица, крепкую о нас помощь видяще, никтоже восстанет на ны.

### На хвалитех стихиры, глас 1:

Веселися и торжествуй земле Крымская, имея мощи святителя Луки, иже днесь предстоит Невечернему Свету Христу, зрит неизреченную Его доброту и присно молит даровати душам нашим мир и велию милость.

Красуйся и ликуй, граде Симферополе, торжествуйте вси православнии, зряще честныя мощи святителя Луки, источающия исцеления всем, притекающим к ним с верою и воспевающих Христа, подающаго нам мир и велию милость.

Во храме Святыя Троицы, идеже лежат ныне мощи твоя, исцеления подаются всем человеком, верою притекающим к раце твоей, всеблаженне святителю Луко. Темже и мы молим тя: моли спастися душам нашим.

### Слава, глас 8:

Святителю отче Луко, ты Евангельски Господа возлюбил, Божественное Его иго на рамена своя взял еси и крест исповѣдничества, яко легкое Его бремя понесл еси, архипастырский подвиг совершив, и был еси управлен в Царствие Небесное. Темже непрестанно Христа моли спастися душам нашим.

### И ныне, Богородичен:

Владычице, прими молитвы раб Твоих и избави нас от всякия нужды и печали.

### Славословие великое.

## На литургии:

### Блаженны от канона, песнь 3 и 6.

**Прокимен, глас 1:** Уста моя возглаголют премудрость и поучение сердца моего разум.

**Стих:** Услышите сия вси языцы, внушите живущии по вселенней.

**Апостол ко Евреям, зач. 318.**

**Евангелие от Матфея, зач. 11.**

**Прича́стен:** В па́мять ве́чную бу́дет пра́ведник, от слуха зла не убо́ится.

## Ака́фист свя́тителю Луке́, архиепи́скопу Кры́мскому

### Тропа́рь свт. Луке́, глас 1

Возвестите́лю пу́ти спаси́тельного, испове́днице и архипа́стырю Кры́мския земли́, истинный храните́лю оте́ческих преда́ний, сто́лпе непоколебимый, правосла́вия наста́вниче, врачу́ богому́дрый свя́тителю Луко́, Христа́ Спа́са непреста́нно моли́ ве́ру непоколебиму́ правосла́вным дарова́ти, и спасе́ние, и велию́ милость.

### Конда́к, глас 1

Якоже звезда́ все́светлая, добродете́льми сия́ющи, был еси́ свя́тителю, ду́шу же равноа́нгельну сотвори́л, се́го ра́ди свя́тительства са́ном поче́тся, во изгна́нии же от безбо́жных мно́го пострада́л и непоколебим ве́рою пре́быв, враче́бною му́дростию мно́гия исцели́л еси́. Те́мже ны́не честное́ тело́ твоё от земле́нных недр о́бретенное́ дивно́ Госпо́дь просла́ви, да вси ве́рнии вопие́м ти: ра́дуйся, о́тче свя́тителю Луко́, земли́ Кры́мстей похва́ло и утвержде́ние.

### Велича́ние:

Велича́ем тя, испове́днице Христо́в свя́тителю о́тче наш Луко́, и чтим святу́ю па́мять твою́, ты бо мо́лиши за нас Христа́ Бо́га нашего́.

### Конда́к 1.

Возбра́нный свя́тителю Це́ркве Правосла́вныя и испове́днице, возсия́вый стране́ на́шей в земле́ Кры́мстей, яко́ светоза́рное свети́ло, добре́ потруди́вшийся и за и́мя Христо́во гоне́ние претерпе́вый, просла́вляюще́ просла́вльшаго́ тя Го́спода, дарова́вшаго́ нам тебе́ но́ваго мо́литвенника́ и помощника́, похва́льное́ воспева́ем ти́ пение́: ты́ же, яко́ име́яй ве́лие́ дерзнове́ние ко Вла́дыце́ небесе́ и земли́, от вся́ких неду́гов душе́вных и теле́сных свобо́ди нас и до́бре сто́яти в Правосла́вии укрепи́, да вси во умиле́нии зове́м ти:

Ра́дуйся, свя́тителю Кры́мский испове́днице Луко́, врачу́ бла́гий и ми́лостивый.

### И́кос 1.

А́нгелов собе́седниче́ и челове́ков наста́вниче́, Луко́ пресла́вный, подо́бно Евангели́сту́ и апо́столу́ Луке́, ему́же тезоимени́т сый, от Бо́га дар це́лити неду́ги челове́ческия́ прия́л еси́, во врачевании́ болезне́й ближних, мно́гия труды́ поды́мля, и, плоть но́ся, о́ плоти́ не раде́л еси́, де́лы до́брыми́ Отца́ Небе́снаго́ просла́вил еси́. Те́мже благода́рно во умиле́нии зове́м ти:

Ра́дуйся, от ю́ности́ разу́м свой и́гу Христо́ву покоривый.

Ра́дуйся, пречестное́ Святы́я Трои́цы селе́ние бывый:

Ра́дуйся, бла́женство́ ми́лостивых, по Сло́ву Го́спода, унасле́дова́вый.

Ра́дуйся, ве́рою Христо́вою́ и зна́нием богодарова́нным мно́гия недужны́я исцели́вый:

Ра́дуйся, стра́ждущих неду́гами теле́сными́ врачу́ ми́лосе́рдный.

Ра́дуйся, во дни бра́ни вождей и вои́нов исцелителю:  
Ра́дуйся, всех врачей наставниче.  
Ра́дуйся, ско́рый в нуждах и ско́рбех су́щим помо́щниче:  
Ра́дуйся, Це́ркви Правосла́вныя утвержде́ние.  
Ра́дуйся, земли́ на́шей озаре́ние:  
Ра́дуйся, крýмския па́стывы похвало́.  
Ра́дуйся, гра́да Симфе́рополя украше́ние:  
Ра́дуйся, святи́телю Крýмский испове́дниче Луко́, врачу́ благи́й и ми́лостивый.

### Конда́к 2.

Ви́дя в челове́цах во вре́мя врачеваний, а́ки в зерка́ле, премúдрость и сла́ву Творца́ вся́ческих Бо́га, к Немú ду́хом вы́ну возноси́лся еси́, богомúдре, све́том же богоразумия твоего́ и нас озари, да вопием купно с тобою: Аллилуиа.

### И́кос 2.

Ра́зум твой Боже́ственными уче́ными просвети́л еси́, Луко́ всесла́вне, отве́ргнув вся́ко плотское́ мудрова́ние, с ра́зумом же и волю́ повинул еси́ Господеви. Подобен апосто́лом быв, тии бо по слову Христо́ву: «Грядита по Мне, и сотворю́ вы ловца́ челове́ком» оста́виша вся́ и по Нем идо́ша, и ты, свя́те, услы́шав зову́щаго тя на служе́ние Го́спода Иису́са чрез раба́ Своего́ архиеписко́па Ташкентского́ Иннокенти́я а́бие прие́млеши свяще́нство в Це́ркви Правосла́вней. Сего́ ра́ди, я́ко богомúдраго наставника́, ты ублажа́юще, воспева́ем си́це:

Ра́дуйся, А́нгела Храни́теля увесе́ление.  
Ра́дуйся, я́ко того́ нико́лиже опе́чалил еси́:  
Ра́дуйся, во уче́нии преспева́вый и тем мудрецы́ ми́ра сего́ удививый.  
Ра́дуйся, от творя́щих беззако́ние уклони́вшийся:  
Ра́дуйся, Бо́жия Премúдрости созерца́телю и пропове́дниче.  
Ра́дуйся, и́стиннаго богосло́вия златосло́весный учи́телю:  
Ра́дуйся, апосто́льских преда́ний блюсти́телю.  
Ра́дуйся, свеще́, Бо́гом возже́нная, мрак нече́стия разгона́ющая:  
Ра́дуйся, звездо́, путь ко спасе́нию показу́ющая.  
Ра́дуйся, Правосла́вия ревни́телю:  
Ра́дуйся, раско́льников обли́чителю.  
Ра́дуйся, свиде́ний и оправда́ний Го́сподних возжа́давый:  
Ра́дуйся, святи́телю Крýмский испове́дниче Луко́, врачу́ благи́й и ми́лостивый.

### Конда́к 3.

Си́лою благода́ти Бо́жия, е́ще во вре́менной жи́зни прия́л еси́ дар, свя́те Луко́, неду́ги цели́ти, да вси, усер́дно притека́ющие к тебе́ неду́гов теле́сных и па́че душе́вных исцеления́ сподобля́ются, вопия́ Бо́гу: Аллилуиа.

### И́кос 3.

Име́я неусы́пное попече́ние о спасе́нии душ, вве́ренных тебе́ от Бо́га, Луко́ блаже́нне, па́стырски к душе́спаси́тельной жи́зни, и словом и са́мым де́лом непреста́нно наставля́л еси́. Сего́ ра́ди приими́ от на́шего усер́дия досто́йныя похвалы́ тебе́:

Ра́дуйся, Бо́жия ра́зума исполненный.  
Ра́дуйся, благода́тию Ду́ха Свята́го преосене́нный:

Ра́дуйся, нищеты́ Христо́вы подража́телю.

Ра́дуйся, па́стырю до́брый, уклоняющихся от ве́ры правосла́вныя и блуждающих по го́рам суемудрия, взыска́вый:

Ра́дуйся, де́лателью виногра́да Христо́ва, ча́д Бо́жих укрепля́й в и́стинной ве́ре правосла́вней.

Ра́дуйся, щите́, защища́й благоче́стие:

Ра́дуйся, непоколебимое Правосла́вия основа́ние.

Ра́дуйся, твёрдый ка́меню ве́ры:

Ра́дуйся, душепа́губного неверия́ и злотво́рного обновле́нчества обличи́телю и искоре́нителю.

Ра́дуйся, в де́лании духо́внем подвиза́ющихся му́дрый укрепите́лю:

Ра́дуйся, от ми́ра изгнанн́ым пристани́ща тиха́го указа́телю.

Ра́дуйся, яко́ приим крест Христу́ последовал еси́:

Ра́дуйся, святителю́ Кры́мский испове́днице Луко́, врачу́ благи́й и ми́лостивый.

#### Конда́к 4.

Бу́рю внутрь имѣя помышле́ний мно́гих, недоумева́ше раб Бо́жий, что рече́т о нем Го́сподь, егда́ проразумева́ху его́ досто́йна бы́ти еписко́пом гра́ду Ташкѣнту: оба́че всего́ себе́ Христу́ Бо́гу предаде́, Тому́ о всем благодарѣ́ние возсыла́я, зовы́й: «Благослове́н Бог, изли́ваяй благодать Свою́ на архиере́и Своя́». И по́я Ему́: Аллилу́иа.

#### И́кос 4.

Слы́шавше лю́дие правосла́внии, в гонѣ́нии су́щии, о благопло́дных добро́тах души́ твоея́, богоно́се Луко́, и виде́ша на степѣ́ни святительства́, яко́ досто́йный сосуд Бо́жественныйя́ благодати́, вся немощна́я врачу́ющая́ и оскудева́ющая́ восполня́ющая́, дивя́тся чу́дному промы́слению́ Бо́га о тебе́ и прино́сят ти сицевая́ благохвалѣ́ния:

Ра́дуйся, архиере́ю, от Само́го Го́спода прона́реченный.

Ра́дуйся и в надписа́нии кни́ги твоея́ сан еписко́па тебе́ предуказа́вый:

Ра́дуйся, иера́рхов украше́ние.

Ра́дуйся, па́стырю до́брый, яко́ гото́в был еси́ души́ твою́ положи́ти за о́вцы своя́ словѣ́сныя:

Ра́дуйся, многосве́тлый Це́ркве свети́льнице.

Ра́дуйся, апо́столов соприча́стнице:

Ра́дуйся, испове́дников украше́ние.

Ра́дуйся, о себе́ попече́ние всякое́ отвергый:

Ра́дуйся, скорбе́й утолите́лю.

Ра́дуйся, о людских не́вежестви́их печа́льнице:

Ра́дуйся, иска́вших спасѣ́ния правым уче́нием оглаша́вый.

Ра́дуйся, житие́м твоим се́го уче́ния не посрамивый:

Ра́дуйся, святителю́ Кры́мский испове́днице Луко́, врачу́ благи́й и ми́лостивый.

#### Конда́к 5.

Богото́чною кро́вию от вѣчны́я сме́рти иску́пленныя соблюда́я, егда́ сан еписко́па в дни стра́шных гонѣ́ний по благослове́нию свята́го Патриарха́ Тихо́на от рук еписко́пов правосла́вных прия́л еси́, святителю́ Луко́, де́ло благовестника́ до́бре сотворил еси́, обли́чая, за́прещая́, умо́ляя, со вся́ким долготерпѣ́нием и уче́нием, и по́я Бо́гу: Аллилу́иа.

## Икос 5.

Видевше ангельстии чинове великия твоя подвиги, егда по заповеди Господней: «Блажени изгнани правды ради: яко тех есть Царствие Небесное», в крепости сердечней безропотно понесл еси заточение и изгнание в Сибирь за имя Господа и святую Церковь Христову, терпением велиим устрояя свое спасение, примером же своим верных души назидая. Мы же ты усердно любовью почитающе чувствуем похвалами сими:

Радуйся, светильниче на свещнице церковнем поставленный.

Радуйся, яко слово Писания: «Любы долготерпит», на тебе оправдася:

Радуйся, защищати ты верным воспретивый.

Радуйся, властем повинувыйся и сего ради волею в руки воинов нощию предавыйся:

Радуйся, клеветы неправедных судей униженный.

Радуйся, в заточение со смирением безропотно шедый:

Радуйся, из управляемая тобою Ташкентския епархии правды ради изгнанный.

Радуйся, верными оплаканный:

Радуйся, за Господа распятого изъязвленный и зашутенный.

Радуйся, уста лживых неверов заградивый:

Радуйся, праведными устами небесныя истины и в изгнании вещавый.

Радуйся, яко мученицы на небесех о терпении твоём ликовашу:

Радуйся, святителю Крымский исповедниче Луко, врачу благий и милостивый.

## Кондак 6.

Проповедник немолчный тайны Пресвятыя, Единосущныя и Неразделимыя Троицы был еси и в темнице, и во градех сибирскаго изгнания, терпя глад, мраз северныя страны и жестокость клеветов безбожных. Сего ради проповедует Церковь Крымская величия Божия явленныя на тебе, святителю Луко, яко приял еси дар целити недуги душевныя и телесныя и в стране изгнания, да вси единым сердцем и едиными усты, воспеваем Богу: Аллилуиа.

## Икос 6.

Воссиял еси, яко звезда лучезарная, красноярстей пастве и тамбовстей, озаряя души верных и разгоняя тьму нечестия и безбожия. И исполнишася на тебе слова Христовы: «Блажени есте, егда поносят вам, и ижденут, и рекут всяк зол глагол на вы лжуще, Мене ради». Ты же, гонимый из града во град и клеветы терпя, архипастырское служение усердне исполнил и сладостию писаний твоих насыщал вся алчущия и жаждущия правды, иже благодарне взывают тебе:

Радуйся, наставниче всех к небеси наставляяй.

Радуйся, славы Божией истинный ревнителю:

Радуйся, воине Христов непобедимый.

Радуйся, за Христа Господа темницы и биения терпевый:

Радуйся, смирения Его истинный подражателю.

Радуйся, вместилище Духа Святаго:

Радуйся, вшедый с мудрыми в радость Господа твоего.

Радуйся, корыстолюбия обличителю:

Радуйся, пагубу тщеславия показавый.

Радуйся, беззаконники ко обращению призывавый:

Радуйся, имже сатана посрамися.

Радуйся, имже Христос прославися:

Радуйся, святителю Крымский исповедниче Луко, врачу благий и милостивый.

## Кондак 7.

Хотя́ достойно соверши́ти по́двиг, возложе́нный на тя от Бо́га, обле́кся еси́ во вся ору́жия Бо́жия и стал на брань проти́ву миродержи́телей ве́ка се́го, духо́вом зло́бы поднебе́сным, препоя́сав чре́сла своя́ истино́ю и облекши́сь в броню́ правды, угасил, испове́днице Луко́, вся стрелы́ лукаваго, поя́ Соде́телю и Бо́гу: Аллилуиа.

## И́кос 7.

Но́вое гоне́ние воздви́же беззако́нных челове́к и безбо́жных на Це́рковь Правосла́вную и в дальнюю тае́жную глубину́ угна́ша тя, святи́телю Луко́, и близ сме́рти быв, руко́ю Бо́жиею сохране́н, взыва́л с Па́влом апо́столом: «До ны́нешнего ча́са и алчем, и жа́ждем, и наготу́ем, и стра́ждем, и скита́емся... Гоними, терпи́м: яко́же отрѣ́би миру́ быхом, всем попра́ние доселе́». Се́го ради́, ве́дуще тако́вая, убла́жаем тя:

Ра́дуйся, испове́днице Христо́в блаже́нный.  
Ра́дуйся, мраз лю́тый претерпе́вый:  
Ра́дуйся, близ сме́рти бы́вый, Го́сподом сохране́нный.  
Ра́дуйся, самоотверже́ние всеце́лое показавый:  
Ра́дуйся, уневе́стивый ду́шу твою́ Жениху́ Христу́.  
Ра́дуйся, Го́спода распя́того на кресте́ при́сно пред со́бою предзре́вый:  
Ра́дуйся, во бдени́их и молитвах неосла́бно пребы́вал еси́.  
Ра́дуйся, Единосу́щныя Тро́ицы и́стинный ревни́телю:  
Ра́дуйся, ско́рый от вся́кия боле́зни безме́здный врачу́.  
Ра́дуйся, ломотны́я и опухлы́я уврачева́вый:  
Ра́дуйся, от неисце́льныя гно́йныя боле́зни косте́й и ран здра́ви возста́вивый.  
Ра́дуйся, яко́ ве́рою тво́ею и труда́ми враче́бными́ осла́бленнии исцеле́ша:  
Ра́дуйся, святи́телю Кры́мский испове́днице Луко́, врачу́ благий и милости́вый.

## Кондак 8.

Стра́нник во юдо́ли земне́й быв, терпе́ния, воздержа́ния и чистоты́ о́браз показа́л еси́, испове́днице Луко́. Любо́вь еванге́льскую́ явил еси́, егда́ оте́чество в опа́сности от наше́ствия инопле́менник пребы́ваше, денноно́щно во враче́бнице труди́лся, исцеля́я недуги́ и ра́ны вожде́й и вои́нов оте́чества земна́го, непамятозло́бием и любо́вию уди́вляя всех творя́щих ти напа́сти и мно́гия сим обрати́л ко Христу́ во е́же пе́ти Ему́: Аллилуиа.

## И́кос 8.

Весь испо́льн любве́ Христо́вы, Луко́ благосе́рде, ду́шу твою́ полага́л еси́ за дру́ги тво́я, и яко́ А́нгел Храни́тель прису́щ был еси́ бли́жним и дальним, озло́бленны́я укро́щая, вражду́ющия примиря́я и спасе́ние всем устро́яя. Помина́я труды́ тво́я во благо́ людей оте́чества твоего́, благода́рне взыва́ем ти:

Ра́дуйся, дивну́ю любо́вь ко оте́честву земно́му показавый.  
Ра́дуйся, смире́ния и незло́бия учите́лю:  
Ра́дуйся, изгна́ние и жесто́кия му́ки мужемудре́нно претерпе́вый.  
Ра́дуйся, за Христа́ пострада́вый и му́чимый:  
Ра́дуйся, твёрдо Его́ исповеда́вый.  
Ра́дуйся, злобу́ враго́в любо́вию Христо́вою победи́вый:  
Ра́дуйся, о́тче благосе́рдный, взыска́вый спасе́ния мно́гих.  
Ра́дуйся, яко́ вели́кими скорб́ями́ был иску́шаем:  
Ра́дуйся, в гоне́ниях терпе́ние дивно́е явивый.

Ра́дуйся, я́ко за враги́ умоля́л еси́ Го́спода:  
Ра́дуйся, е́гоже лю́бовь победи́ всяку вражду́.  
Ра́дуйся, е́гоже незло́бие покори́ жестокия сердца́:  
Ра́дуйся, святи́телю Кры́мский испове́днице Луко́, врачу́ благи́й и ми́лостивый.

### Конда́к 9.

Всем был еси́ вся, я́коже и святи́й Па́вел, да вся́ко не́кия спасе́ши, святи́телю Луко́, архипа́стырский по́двиг соверша́я в тамбовстем кра́е, мно́гими труды́ храмы обновля́я и созда́я, Уста́вы Святооте́ческа строго́ соблю́дая, спасе́нию па́стывы твоея́ служи́ти не преста́л еси́, чисто́ Бо́гови пою́ще: Аллилуиа.

### И́кос 9.

Витии́ челове́чести не возмо́гут по досто́янию изре́щи твои́х благодея́ний мно́жество, егда́ явился на Кры́мстей земли́, я́ко отец чадолюбивый, святи́телю о́тче Луко́. Щедро́дательная бо десница́ твоя́ всюду́ дося́заше. Мы же благосе́рдию твоему́ подра́жати хотя́ще, во удивле́нии зыва́ем к тебе́:

Ра́дуйся, лучу́ лю́бве Бо́жия.  
Ра́дуйся, сокрови́ще милосе́рдия Спа́сова неисчи́мое:  
Ра́дуйся, я́ко вся своя́ неиму́щим раздава́л еси́.  
Ра́дуйся, бли́жняя твоя́ па́че себе́ возлю́бивый:  
Ра́дуйся, безма́терних си́рот пита́телю и окорми́телю.  
Ра́дуйся, беспомо́щных ста́рцев и ста́риц попечи́телю:  
Ра́дуйся, я́ко боля́щия и в темни́це заключе́нныя посеща́л еси́.  
Ра́дуйся, я́ко ну́жды бе́дных предва́рял в разли́чных места́х оте́чества своего́:  
Ра́дуйся, я́ко ни́щия поми́ная, обе́ды им устраи́вал еси́.  
Ра́дуйся, я́ко коему́ждо в го́рестех, а́ки А́нгел утешите́ль явля́лся еси́:  
Ра́дуйся, А́нгеле земны́й и челове́че небе́сный.  
Ра́дуйся, я́ко о глубине́ милосе́рдия твоего́ Ма́ти Бо́жия возра́довася:  
Ра́дуйся, святи́телю Кры́мский испове́днице Луко́, врачу́ благи́й и ми́лостивый.

### Конда́к 10.

Спасе́нию кры́мския па́стывы твоея́ служи́ти многоле́тне не преста́л по о́бразу па́стыреначальника́ Христа́ на ра́мех заблудше́е взем естество́ Бо́гу и Отцу́ приве́л еси́. Бо́жиим бо милосе́рдием утеша́я, ко исправле́нию жития́ словеса́ учительными твоими́ влекл еси́ вся, во е́же се́рдцем чисти́м пе́ти Бо́гу: Аллилуиа.

### И́кос 10.

Ца́ря Небе́снаго Христа́ Бо́га ве́рный служи́телю быв, святи́телю о́тче Луко́, неуста́нно возвеща́л сло́во истины́ во всех хра́мах земли́ на́шея Таври́ческа, душеспаса́тельною пи́щею уче́ния ева́нгельскаго ве́рныя ча́да науча́я и Уста́в Церко́вный строго́ исполня́ти повелева́я. Те́мже ты, я́ко па́стыря́ добра́го, си́це прославля́ем:

Ра́дуйся, неутомимый пропове́днице́ правды ева́нгельския.  
Ра́дуйся, я́ко Бо́гом вру́ченное тебе́ ста́до сло́весное до́бре пасы́й:  
Ра́дуйся, я́ко о́вцы своя́ сло́весныя от душегубных волков охраня́вший.  
Ра́дуйся, чи́на церко́внаго стро́гий блюсти́телю:  
Ра́дуйся, чистоты́ ве́ры правосла́вныя охраните́лю.



Ра́дуйся, тобо́ю бо Дух Святы́й написа́ словеса́ спасительны́я:  
Ра́дуйся, яко́ тайну́ богослoвiя о́ ду́хе, ду́ше и́ теле́ явил еси́ нам.  
Ра́дуйся, яко́ слово́ твоё, аки в ризы́ позлаще́ны, тайны́ ве́ры оде́яшася:  
Ра́дуйся, молни́е, горды́ню низлага́ющая.  
Ра́дуйся, гро́ме, беззако́нно живу́щия устра́шай:  
Ра́дуйся, церковна́го благоче́стия насадителю́.  
Ра́дуйся, архипа́стырю, па́стыри духо́вныя наставля́яй и вразумля́яй непреста́нно:  
Ра́дуйся, святи́телю Кры́мский испове́днице Луко́, врачу́ благо́й и ми́лостивый.

### Конда́к 11

Пе́ние у гроба́ твоёго́, уго́днице Бо́жий, не умолка́ше во днех блаже́ннаго успе́ния твоего́. Мнози бо ве́дяху тя богоно́сна и равноа́нгельна су́ща, собра́шася от всех преде́л земна́го твоего́ оте́чества соверши́ти соборно́е моле́ние о ду́ше твоей, восходя́щая в горни́я обители́ оте́чества небе́снаго воспева́я и поя́ Бо́гу: Аллилу́иа.

### И́кос 11

Свещá еси́ в це́ркви Христо́вой, горя́щая невеще́ственным све́том благода́ти Бо́жией был еси́, святи́телю Луко́, вся концы́ земли́ наша́ озаря́я. Егда́ же приспе́ вре́мя отше́ствия твоего́, Боже́ственнии А́нгели прия́ша святу́ю ду́шу твою́, и в небе́сныя обители́ вознесо́ша. Те́мже, помина́юще блаже́нное успе́ние и ве́лие твоё на небеси́ и на земли́ прославлéние, с радости́ю прино́сим ти благохва́ления сия́:

Ра́дуйся, свети́льнице немеркнущий Све́та Невече́рняго.  
Ра́дуйся, яко́ мнози прослави́ша чрез твои́ до́брыя дела́ Отца́ Небе́снаго:  
Ра́дуйся, яко́ свет до́брых дел твоих просвети́лся пред челове́ки.  
Ра́дуйся, житие́м твоим праведным Бо́гу уго́дивый:  
Ра́дуйся, уго́днице Бо́жий, те́чение благоче́стне сконча́вый.  
Ра́дуйся, ве́ру, наде́жду и лю́бы от Го́спода стяжа́вый:  
Ра́дуйся, со Христо́м, Его́же возлюбил еси́, на ве́ки соедини́выйся.  
Ра́дуйся, Царства́ Небе́снаго и сла́вы ве́чныя насле́днице:  
Ра́дуйся, архиере́ю, от ве́чнаго Архиере́я Христа́ благода́тными дара́ми испо́лненный.  
Ра́дуйся, ско́рый помо́щнице призыва́ющим тя:  
Ра́дуйся, земли́ Кры́мския но́вое свети́ло и утвержде́ние.  
Ра́дуйся, рода́ христиа́нскаго благода́тный покровите́лю:  
Ра́дуйся, святи́телю Кры́мский испове́днице Луко́, врачу́ благо́й и ми́лостивый.

### Конда́к 12

Благода́ть свы́ше ти да́нную позна́вше, благоговейно́ лобыза́ем честна́го ли́ка твоего́ изображе́ние, святи́телю Луко́, чаю́ще тобо́ю получи́ти проси́мое от Бо́га. Те́мже припада́я ко святы́м мо́щем твоим со уми́лением мо́лим тя: укрепи́ нас до́бре стоя́ти в ве́ре правосла́вней и угожда́юще благо́ими де́лы немол́чно пе́ти Бо́гу: Аллилу́иа.

### И́кос 12

Пою́ще Бо́га, дивна́го во святы́х Свои́х, хва́лим тя, Христо́ва испове́дника, святи́теля и предста́теля пред Го́сподем. Весь бо еси́ в вы́шних, но и нижних не оставля́еши, святи́телю отче Луко́, присно́ со Христо́м ца́рствуеши и о нас грешных пред престоло́м Бо́жиим ходата́йствуеши. Сего́ ра́ди во уми́лении зове́м ти:

Ра́дуйся, све́та непристу́пнаго зри́телю.  
Ра́дуйся, звездо́ лучеза́рная, над земле́ю на́шею возсия́вшая:  
Ра́дуйся, ему́же сора́дуются А́нгелы, и о нем же веселя́тся челове́цы.  
Ра́дуйся, научи́вый за́поведем Христо́вым и сотвори́вый я:  
Ра́дуйся, яко́ досто́ин яви́лся еси́ Ца́рствия Небе́снаго.  
Ра́дуйся, путе́м испове́дничества райских селе́ний дости́гший:  
Ра́дуйся, поноше́ния Христа́ ра́ди терпе́вый и ве́чную с Ним сла́ву прия́вый.  
Ра́дуйся, ду́ши на́ша к Ца́рствию Небе́сному путево́дяй:  
Ра́дуйся, предста́телю пред Престо́лом Бо́жиим за нас гре́шных.  
Ра́дуйся, Правосла́вия похвало́ и земли́ на́шея ра́дование:  
Ра́дуйся, в сонме святы́х бы́ти сподоби́выйся.  
Ра́дуйся, Собо́ру всех Кры́мских святы́х соприча́стниче:  
Ра́дуйся, святителю́ Кры́мский испове́дниче Луко́, врачу́ благи́й и ми́лостивый.

### **Конда́к 13.**

О вели́кий и пресла́вный уго́дниче Бо́жий, святителю́ о́тче наш Луко́, приими́ си́е похва́льное пе́ние от нас недостойных, о́баче с любо́вию сыно́внею тебе́ приноси́мое. Предста́тельством твои́м у Престо́ла Бо́жия и моли́твами твои́ми всех нас в ве́ре правосла́вней и до́брых де́лах утверди́. От всяких бед, скорбе́й, боле́зней и напа́стей в сей жи́зни находя́щихся сохрани́, от муче́ний в бу́дущем ве́це избави́. И сподоби́ в ве́чной жи́зни купно́ с тобою́ и со все́ми святы́ми пе́ти Творцу́ на́шему: Аллилу́иа.

**(Сей Конда́к глаго́ли три́жды. А по сем чита́ется И́кос 1 и Конда́к 1.)**

### **МОЛИТВА**

#### **святителю́ Луке́, испове́днику, архиепи́скопу Кры́мскому**

О всеблаже́нный испове́дниче, святителю́ о́тче наш Луко́, вели́кий уго́дниче Христо́в! Со умиле́нием прекло́нше ко́лена серде́ц на́ших, и припа́дая к ра́це честных и многоцеле́бных мо́щей твоих, яко́же ча́да о́тца мо́лим тя всеу́сердно: услыши́ нас гре́шных и принеси́ моли́тву на́шу к ми́лостивому и человеколю́бцу Бо́гу, Ему́же ты ны́не в ра́дости святы́х и с ли́ки а́нгел предстои́ши. Ве́руем бо, яко́ ты люби́ши ны́ тою́ же любо́вию е́юже вся́ бли́жняя возлюбил еси́, пребыва́я на земли́.

Испроси́ у Христа́ Бо́га на́шего да утверди́т во святе́й сво́ей Правосла́вней Це́ркви дух пра́вды ве́ры и благо́честия: па́стырям ея́ да даст святу́ю ре́вность и попече́ние о спасе́нии вверенных им люде́й: пра́во ве́рующия соблю́дати, сла́бых и немо́щных в ве́ре укрепля́ти, неведу́щия наставля́ти, противны́я облича́ти. Всем нам пода́й дар ко́ему́ждо благопотре́бен, и вся́ я́же к жи́зни вре́менной и к ве́чному спасе́нию поле́зная. Гра́дов на́ших утвержде́ние, земли́ плодоно́сие, от гла́да и па́губы изба́вление. Скорбя́щим утеше́ние, недугующим исце́ление, заблудшим на путь и́стины возвра́щение, родителе́м благослове́ние, ча́дом в стра́се Госпо́днем воспита́ние и науче́ние, си́рым и убо́гим по́мощь и заступле́ние.

Пода́ждь нам всем тво́е архи́па́стырское и свято́е благослове́ние, да тобою́ осеня́еми изба́вимся от ко́зней лука́ваго и избе́гнем вся́кия вра́жды и нестро́ений, е́ресей и раско́лов.

Да́руй нам богоуго́дно пре́йти по́прище вре́менной жи́зни, наста́ви нас на путь веду́щий в селе́ния пра́ведных, изба́ви нас возду́шных мыта́рств и моли́ о нас всеси́льнаго Бо́га, да в ве́чной жи́зни с тобою́ непре́станно сла́вим О́тца́ и Сы́на и Свята́го Ду́ха, Ему́же подоба́ет вся́кая сла́ва, че́сть и держа́ва во ве́ки веко́в. Ами́нь.

Составил настоятель храма Трех Святителей (Василия Великого, Григория Богослова и Иоанна Златоуста) г. Симферополя протоиерей Георгий Северин.

